



« 5 » апрель 20 19 у.

№ 245-Ф

Toshkent sh.

Тергов фаолиятида фуқароларнинг ҳуқуқ ва эркинликларига риоя қилиш, ходиса жойини кўздан кечириш, тергов ҳаракатларини ҳодиса содир бўлган жойнинг ўзида инновацион техника воситаларидан фойдаланган ҳолда сифатли ва тўла амалга ошириш, жинойтларнинг “иссиқ изи”дан фош этишни таъминлаш мақсадида:

1. 2019 йил 1 июнга қадар ички ишлар ва прокуратура органларининг тергов-тезкор гуруҳлари 1 ва 2-иловаларга мувофиқ махсус автотранспорт воситалари билан таъминлансин.

2. Қуйидагилар махсус автотранспорт воситаларини харид қилиш ҳамда уларни жиҳозлаш манбалари этиб белгилансин:

ички ишлар органлари учун – Ички ишлар вазирлигининг бюджетдан ташқари махсус жамғармаси маблағлари;

прокуратура органлари учун – Мажбурий ижро бюросини ривожлантириш жамғармаси маблағлари.

3. Истисно тариқасида, тергов-тезкор гуруҳлар учун автотранспорт воситаларини, уларни жиҳозлаш учун зарур асбоб-ускуналар, компьютер техникасини, алоқа воситаларини, учувчисиз учадиган аппаратларни, техник воситаларни, уларнинг эҳтиёт ва бутловчи қисмларини ҳамда бошқа зарур моддий-техника ресурслари етказиб берувчиларни, шунингдек, махсус автотранспорт воситаларини жиҳозлаш бўйича ишларни амалга оширувчи ташкилотларни тендер (танлов) савдолари ўтказмасдан энг яхши таклифларни танлаб олиш асосида аниқлашга рухсат берилсин.

4. Ўзбекистон Республикаси Ахборот технологиялари ва коммуникацияларини ривожлантириш вазирлиги Ички ишлар вазирлигига ҳамда Бош прокуратурага:

махсус автотранспорт воситалари ҳаракатини GPS-навигациядан фойдаланган ҳолда мониторинг қилиш тизимини;

ҳодиса жойида тергов-тезкор гуруҳлари томонидан амалга оширилаётган тергов ҳаракатларини реал вақт режимида кузатиш тизимини жорий қилишга кўмаклашсин.

5. Ўзбекистон Республикаси Ички ишлар вазирлигига ва Бош прокуратурасига тергов-тезкор гуруҳлари фаолияти доирасида қўллаш учун видеорегистраторли учувчисиз учадиган аппаратларни харид қилиш, олиб кириш ва улардан фойдаланишга рухсат берилсин.

6. Мазкур фармойишнинг бажарилишини назорат қилиш Ўзбекистон Республикаси Бош вазирининг ўринбосари – молия вазири Ж.А. Қўчқоров ва Ўзбекистон Республикаси Ички ишлар вазири П.Р. Бобожонов зиммасига юклансин.

Ўзбекистон Республикасининг
Бош вазири



А. Арипов